

Supervizaun sosiedade sivíl ba Setór seguransa no jéneru

KONTEÚDU

Tansá maka jéneru importante ba supervizaun sosiedade sivíl?

Oinsá jéneru bele integra ba supervizaun sosiedade sivíl?

Dezafiu no oportunidade pós-konflitu

Kestaun sira ne'ebé OSS sira bele husu

Iha rekoñesimentu forte katak reforma setór seguransa (SSR) tenke prenxe nesiedade seguransa ba mane, feto, labarik mane no labarik feto. Integrasaun kestaun jéneru hanesan fatór fundamentál ba setór seguransa nia efikásia no responsabilizasaun, inklui mós apropriasaun lokál no lejitimidade husi prosesu SSR.

Nota informasaun ida-ne'e apresenta introdusaun badak kona-ba benefísiu sira ne'ebé bele hetan bainhira integra kestaun jéneru ba supervizaun sosiedade sivíl ba setór seguransa, inklui mós informasaun prátiiku.

Nota informasaun ida-ne'e bazeia ba instrumentu ida ne'ebé naruk liu, no rua ne'e hotu hanesan parte ida husi **Pakote Informasaun kona-ba Jéneru no SSR**. Pakote Informasaun ida-ne'e iha objetivu atu fó introdusaun kona-ba kestaun jéneru ba ema sira ne'ebé envolve iha prosesu SSR no hakerek polítika kona-ba SSR. Pakote informasaun ida-ne'e inklui instrumentu 12 hamutuk nota informasaun - haree informasaun liután.

Tansá maka jéneru importante ba supervizaun sosiedade sivíl?

Supervizaun sosiedade sivíl ba setór seguransa, inklui RSS, envolve partisipasaun ativu hosi organizasaun sosiedade sivíl sira (OSS) hodi define polítika seguransa sira no supervizona estrutura no prátiika autór setór seguransa sira. Ninia objetivu maka atu garante katak interese no perspetiva iha nivel comunidade no baze sei integra iha forneseimentu seguransa internu no esternu, no garante sustentabilidade no envolvimentu tomak husi populasau lokál. OSS sira partisipa iha supervizaun setór seguransa tuir dalan barak, inklui liuhosi akonsellamentu polítika no koñesimentu tékniku sira, monitorizasaun, sensibilizasaun, peskiza no análise.

Jéneru refere ba papél no relasaun, natureza personalidade, atitude, komportamentu no valór ne'ebé sosiedade atribui ba feto no mane sira. Ho nune'e, 'jéneru' refere ba diferenza entre mane no feto ne'ebé *aprende tiha ona*, enkuantu 'seksu' refere ba diferenza *biolójika* entre mane no feto. Iha papél jéneru oioin entre kultura ida-idak, no mós iha kultura nia laran, ne'ebé bele muda husi tempu ba tempu. Jéneru la refere de'it ba feto no mane sira maibé mós refere ba relasaun entre sira.



Hametin apropiasaun lokál

- Bainhira integra kestaun jéneru, no inklui organizasaun fetu sira, bele hametin apropiasaun lokál ba prosesu RSS tanba aseguza katak fetu no mane envolve no iha oportunidade atu espresa sira rasik nia nesesidade, vizaun no prioridade sira. Ho nune'e, populasaun haree katak instituisaun seguransa sira reprezentativu, responsivu no lejítima liután.

Supervizaun komprensivu liuhosi integrasaun kestaun jéneru

- Supervizaun setór seguransa ne'ebé monitoriza oinsá polítika seguransa no justisa, no mós instituisaun sira fó-atensaun ba violénsia bazeia ba jéneru (VBJ) *bele hametin fornimentu seguransa no justisa.*
- Supervizaun setór seguransa ne'ebé garante katak instituisaun setór seguransa iha responsabilizasaun atu kria fatin servisu lahó diskriminasaun, no prevene asédiu seksuál no VBJ sira seluk *bele aumenta produtividade no efikasía operasionál.*
- Supervizaun setór seguransa ne'ebé garante katak instituisaun setór seguransa iha responsabilizasaun atu hasa'e rekrutamentu, retensaun no promosaun ba fetu no grupu sira seluk ne'ebé ladún hetan representasaun *bele hametin konfiansa públiku no efikasía.*

Supervizaun efetivu liuhosi envolvimentu organizasaun fetu sira

- Organizasaun fetu sira dala barak sai nu'udar rekursu ne'ebé seidak utiliza ba supervizaun setór seguransa. Sira bele reforsa supervizaun liuhosi:
 - Fornese akonsellamentu kona-ba polítika sira hodi hasa'e transparénsia, responsabilizasaun no kapasidade hodi responde.
 - Monitoriza implementasaun akordu internasionál no rejionál, no mós polítika nasional ho institusionál.
 - Fornese kapasitasaun ba órgaun supervizaun sira kona-ba kestaun jéneru.
 - Identifika ameasa ba seguransa no kestaun sira ne'ebé indivíduu no comunidade sira hasoru.

- Fasilita diálogu entre comunidade lokál no órgaun supervizaun setór seguransa.
- Hasa'e sensibilizasaun públiku hodi oinsá atu kaer responsabilidade instituisaun setór seguransa.

Kaixa 1

Monitoriza Implementasaun Lejizlasaun

Iha Malázia, OSS sira hanesan 'Organizasaun Asisténsia Fetu' nian halo ona monitorizasaun ba ezekeusaun no efikasía sira ba Lei Violénsia Doméstika, no mós prestasaun servisu ba vítima sira. Rezultadu sira uza tiha hodi enkoraja esforsu atu hadi'ak substánsia no implementasaun lejizlasaun.

Iha Kamboja, organizasaun fetu sira no grupu direitus umanus sira hanesan LICADHO servisu hamutuk ho ajénsia supervizaun governu nian hodi investiga alegasaun kona-ba abuzu no hodi monitoriza kumprimentu ba Lei ne'ebé foin daudauk aprova iha Kamboja kona-ba Prevensaun Violénsia Doméstika no Protesaun ba Vítima. Lei ida-ne'e fó poder boot liu ba polísia hodi halo intervensaun iha kazu violénsia doméstika no hametin dalan legál ne'ebé disponivel ba vítima sira. Aleinde monitorizasaun, OSS sira fornese assisténsia jurídiku no uma mahon ba vítima sira.

Kumprimentu ba obrigasaun tuir direitu no instrumentu internasionál

Inisiativa atu integra kestaun jéneru ba reforma polísia no la'ós de'it kestaun kona-ba operasaun nia efikasía; presiza kumpre ho direitu, instrumentu no norma internasionál no rejionál kona-ba seguransa no jéneru. Instrumentu importante hirak ne'e inklui:

- *Deklarasaun Beijing no Plataforma ba Asaun (1995)*
- *Rezolusaun 1325 husi Konsellu Seguransa Nasoins Unidas kona-ba Fetu, Pás no Seguransa (2000)*

Atu hetan informasaun liu tan, favor bele haree iha aneksu instrumentu kona-ba direitu no instrumentu internasionál no rejionál.

Oinsá jéneru bele integra ba supervizaun sosiedade sivíl?

Órgaun monitorizasaun setór seguransa

- Hametin partisipasaun organizaun fetu sira iha órgaun supervizaun setór seguransa, hanesan komisaun supervizaun sivíl nian, komisaun keixa públiku, ekipa tékniku peritu no grupu monitorizasaun independente sira (haree Kaixa 1).
- Tau kestaun jéneru sira, hanesan prevensaun ba VBJ ka hasa'e rekrutamentu fetu, iha ajenda órgaun monitorizasaun setór seguransa.

Peskiza no rekolla dadus

- Asegura katak kestaun jéneru sira integra ona ba avaliasaun internu no esternu ka revizaun polítika no instituisaun setór seguransa sira.
- Asegura katak dadus sira sei tau haketak tuir seksu. Dadus dezagregadus subliña katak fetu no mane sira iha sirkunstánsia ne'ebé la hanesan, no dadus ne'e sai baze ne'ebé presiza hodi fornese servisu seguransa sira ne'ebé justu.
- Halo auditoria jéneru kona-ba polítika ka instituisaun setór seguransa nian.
- Hala'o análise jéneru ba prosesu RSS no habelar konkluzaun no rekomendasaun sira liuhosi imprensa no fó ba funsionáriu governu no doador sira.
- Hala'o análise orsamentu jéneru ida ba orsamentu sira-ne'ebé governu gasta ba defeza ka seguransa ka orsamentu husi instituisaun setór seguransa ida-idak, hodi hasa'e kompriensaun kona-ba impaktu spesífiku husi alokasaun orsamentu ba mane no fetu. Uza rezultadu sira-ne'e hanesan instrumentu atu halo advokasia.
- Asegura katak fetu no organizaun fetu sira inklui mós iha auditoria, avaliasaun, planeamentu, implementasaun, monitorizasaun no prosesu avaliasaun hotu-hotu ne'ebé realiza hosi OSS sira.

Advokasia no sensibilizasaun

Uza peskiza sensivel-jéneru no rezultadu avaliasaun sira ho prosesu halibur dadus hodi dezenvolve informasaun públiku no kampaña advokasia sira kona-ba kestaun seguransa ne'ebé relasiona ho jéneru – hanesan sensibilizasaun oinsá hato'o relatóriu kona-ba VBJ ba polisia ka halo lobi ba governu atu fó fundu ba programa sira atu prevene violénsia ho kilat.

- Identifika oinsá bele hato'o informasaun ne'e ba populasan marjinalizadu (hanesan populasan rurál, fetu analfabetu ka comunidade étniku) ne'ebé lahatene ko'alia lian ne'ebé dominante.
- Foka advokasia iha nivel oioin –lokál, provinsial ka nasionál – hodi alkansa polítika-na'in xave sira ne'ebé bele influensia programasaun setór seguransa.
- Hamutuk ho imprensa lokál hafahe informasaun liuhosi jornál ki'ik sira, rádiu comunidade no estasaun televizaun lokál sira, ho mídia-komunikasaun estatál nian.
- Servisu ho imprensa hodi sensibiliza jornalista sira no sira seluk kona-ba perspetiva jéneru iha kestaun seguransa no justisa.
- Envolve mane iha kampaña advokasia sira, liuliu sira-ne'ebé iha ligasaun ho violénsia hasoru fetu (haree Kaixa 2).

Formasaun jéneru

Organizaun fetu sira no OSS sira hamutuk ho matenek-na'in jéneru sira bele apoia dezenvolvimentu no implementasaun treinamentu jéneru ba funsionáriu setór seguransa (haree Kaixa 3), inklui liuhosi:

- Hala'o avaliasaun kona-ba nesesidade formasaun.
- Dezenvolve materiál formasaun jéneru no fó formasaun.
- Dezenvolve kurríkulu formasaun jéneru estandarte ida ne'ebé treinador sira bele adota hodi halo tuir.
- Halo lobi ba polítika ne'ebé fó mandatu kona-ba formasaun komprensivu ba jéneru
- Kria oráriu ida ba treinador sosiedade sivíl sira.

OSS sira ne'ebé partisipativu no efetivu

OSS sira ne'ebé envolve iha supervizaun setór seguransa mós iha obrigasaun atu reeve polítika no práttiku internu atu promove igualdade jéneru, no atu garante katak iha kapasidade internu kona-ba asuntu jéneru:

- Dezenvolve polítika no prosedura jéneru no oportunidade iguál ne'ebé fó-atensaun ba kestaun rekursu umanu, práttika rekutamentu, rekizitu komportamentu servisu, asédiu seksuál no diskriminasaun.
- Fó treinamentu jéneru ba funsionáriu sira hotu – inklui treinamentu kona-ba halibur dadus ne'ebé sensível ba jéneru no metodolojia peskiza nian.
- Integra kestaun jéneru iha servisu supervizaun setór seguransa.
- Hala'ó auditoria internu kona-ba jéneru hodi avalia kapasidade organizasionál.

Instrumentu 9 mós inklui ...

- Faze ida-idak husi Auditoria Jéneru RSS
- Pergunta sira ne'ebé tenke hato'o bainhira planeia kampaña advokasia
- Instrusaun atu servisu hamutuk ho mídia
- Tópiku treinamentu hodi harii kapasidade husi ONG feto sira nian atu halo supervizaun
- Oinsá bele hametin lejitimidade husi rede sira sosiedade sivil nian
- Ezemplu sira husi Europa Leste, Fiji, Irake, Rúsia Áfrika Súl, Reinu Unidu no Áfrika Osidentál

Dezafiu no oportunidade pós-konflitu

OSS sira bele fahe-malu no sai fraku tiha durante konflitu, no hanesan rezultadu dalaruma sira la alkansa sira-nia objetivu, lejitimidade ka kapasidade atu halo supervizaun ho efetiva ba setór seguransa. Iha kazu sira seluk, kolaborasaun entre OSS sira bele hasa'e tan iha períodu pós-konflitu, tanba reforma militar, no mós seguransa maka sai preokupasaun prinsipál ba organizasaun barak, hodi fó oportunidade ba sira atu servisu hamutuk.

Kaixa 2

Envolve mane sira atu kombat violénsia hasoru feto

Kampaña Lasu Mutin (KLM) lansa ona iha Kanadá iha tinan 1991 hosi grupu mane ida hodi hapara violénsia hasoru feto no hodi eduka mane seluk kona-ba asuntu ida-ne'e. Liuhosi kampaña sensibilizasaun, deklarasaun públiku sira no sira-nia rede-servisu ne'ebé aumenta beibeik, membru KLM fornese vizaun alternativu ida kona-ba asaun maskulinidade sein-violénsia no oferese ezemplu di'ak ne'ebé pozitivu ba mane no labarik mane sira iha comunidade sira iha mundu tomak.

Obstákulu ba integrasaun kestaun jéneru sira

- Kapasidade instituisaun estadu sira dala barak maka sai fraku, maski ho tendénsia katak sira iha duni vontade polítiku, meius sira hodi oferese servisu seguransa no justisa ne'ebé la disponivel, husi perspetiva tékniku, finanseira ka rekursu umanu.
- Dala barak la iha lei, estrutura no mekanizmu hodi prevene no responde ba VBJ, ka ladún funsiona ho didi'ak.
- Funsionáriu setór seguransa sira dalaruma komete mós abuzu direitus umanus, no bele kontinua nafatin halo abuzu sira iha tempu pás nia laran.

Oportunidade ba integrasaun kestaun jéneru

- Prosesu RSS bele loke espasu polítiku atu rona opiniaun husi OSS sira kona-ba seguransa no prosesu halo desizaun iha setór justisa, ne'ebé sai hanesan oportunidade ida atu foti kestaun jéneru.
- Iha indikasaun katak papél no relasaun jéneru dala barak muda durante no depoizde konflitu, ne'ebé bele loke espasu importante hodi ko'alia kona-ba integrasaun kestaun jéneru no aumenta rekutamentu feto.
- Doadór sira bele iha vontade atu fornese assisténsia ba OSS sira hodi harii sira-nia kapasidade atu hala'ó supervizaun ne'ebé sensível ba jéneru.

Kaixa 4

Ezemplu lista jéneru nian ba órgaun supervizaun seguransa sira iha kontestu pós-konflitu

- ✓ Oinsá sosiedade sivíl, inklui feto, inklui ona iha prosesu supervizaun sira?
- ✓ Oinsá feto no mane sira-nia nesesidade seguransa identifika ho prenxe?
- ✓ Mane no feto hira maka servisu iha militar, polisia, servisu intelijénsia, polisia fronteira, alfândega, servisu imigrasaun no servisu ba aplikasaun lei sira seluk, no sira-nia pozisaun saida (persentajen feto/ mane sira, tuir klase no kategoria)?
- ✓ Sasukat saída maka iha hodi asegura katak feto iha oportunidade hanesan hodi sai parte hosi instituisaun seguransa hotu-hotu?
- ✓ Formasaun jéneru fornese ka lae ba polisia, militar no servisu seguransa seluk?
- ✓ Sasukat saída maka iha hodi prevene, investiga no fó-kastigu ba VBJ ne'ebé halo husi funsionáriu setór seguransa sira?
- ✓ Iha finansiametu adekua ba programasaun ne'ebé relasiona ho jéneru?

Kaixa 3

Edukasaun saúde seksuál ba forsa armada iha Mongólia

ONG ida hanaran 'Mongol Vision' serbisu kona-ba asuntu saúde reprodutiva ho soldadu no ofisiál sira iha Mongólia nia forsa armada:

Asuntu: Rekruta foun sira iha Mongólia nia forsa armada, liuliu sira husi kampu, iha koñesimentu uitoan de'it, ka la iha koñesimentu, kona-ba HIV/SIDA no ITS. Konsekuentemente, iha ofisiál no soldadu barak ne'ebé hetan ITS.

Objetivu: Hetan apoiu husi Ministériu Defeza no Mongolia nia Força Armada hodi hasa'e koñesimentu kona-ba HIV/SIDA, ITS no saúde reprodutiva entre ofisiál no soldadu sira.

Parseiru xave: Ministériu Defeza no kuartél-gerál husi Mongolia nia forsa armada.

Parseiru prinsipál: Soldadu/ofisiál no sira nia parseiru seksuál.

Aprosimasaun sira no komunikasaun: Surat balu haruka ona ba Ministériu Defeza no kuartél-gerál husi forsa armada; enkontru ofisiál no naun-ofisiál hala'o ona ho ofisiál sira iha nivel aas; projetu ida dezenvolve ona liuhosi kolaborasaun ho ofisiál sira iha nivel aas; workshop ida hala'o ona ho ofisiál nivel aas; komandante no doutór sira husi unidade militar apresenta ona relatóriu ida kona-ba númeru pesoál forsa armada ne'ebé hetan ITS.

Indikadór sira kona-ba susesu no sustentabilidade: Saúde seksuál inklui iha kurríkulu edukasaun ofisiál ba funsionáriu militar; tenke hasa'e koñesimentu entre ofisiál sira iha nivel aas; no hasa'e apoiu husi Ministériu Defeza.



Kestaun sira ne'ebé OSS sira bele

husu

Organizasaun sosiedade sivil sira bele hala'o avaliasaun ida, nu'udar dalan ne'ebé efetivu hodi identifika pontu entrada sira atu integra kestaun jéneru sira ba prosesu RSS. Tuir mai maka ezemplu kestaun sira kona-ba jéneru ne'ebé OSS sira bele inklui iha avaliasaun no monitorizasaun ba RSS.

- Saída maka sai nesesidade espesial sira ba seguransa no justisa, persesaun no prioridade sira ba mane, feto, labarik feto no labarik mane sira?
- Funsionáriu setór seguransa iha kapasidade atu responde ba nesesidade sira-ne'e? Karik lae, tansá maka la bele?
- Feto, mane, labarik mane no labarik feto sira iha direitu hanesan atu hetan asesu ba servisu seguransa no justisa?
- Lejizlasaun seguransa, polítika no protokolu sira sensivel be jéneru ka lae? Iha lejizlasaun ne'ebé adekuada kona-ba VBJ?
- Feto sira bele ka lae hetan asesu tomak no iguál atu servisu iha instituisaun setór seguransa?
- Oinsá ambiente servisu iha instituisaun setór seguransa sira? Iha ka lae problema kona-ba asédiu seksuál no obstákulu sira seluk ne'ebé prevene feto atu hetan promosaun?
- Órgaun supervizaun setór seguransa inklui feto no konsulta ho organizasaun feto sira?
- Órgaun supervizaun setór seguransa monitoriza ka lae kestaun sira kona-ba VBJ no oportunidade iguál ba mane no feto sira?